

欽定大清會典事例

卷一百十三至  
一百十五

吏部

處分例



欽定大清會典事例卷一百十三

吏部

處分例

服飾違例

服飾違例○康熙十一年議准。凡違例越分僭用服色者。係官革職。其違禁之物入官。如該管官不行稽察。被旁人獲首到官。審實。將違禁之物。給予獲首之人。其族長係官。罰俸三月。若家下奴僕違禁者。奴僕之主。係官。罰俸三月。其五城司坊官失察者。每次罰俸三月。該城滿漢御史失察者。每事犯二次。罰俸三月。直隸各省軍

民違禁。該督撫失察三次。罰俸三月。司道失察二次。罰俸三月。府州縣官。每次罰俸三月。○雍正五年議准。凡屬員謁見上司。遇公服之日。止用補服。不許擅用朝衣。違者。皆照錯誤禮節例議處。○七年

諭。百官章服。皆有一定之制。所以辨等威。昭品秩也。向來屢申禁約。不許逾分濫用。以開僭越之端。定例昭然。各宜遵奉。聞近來服色頂戴。及坐褥頂馬繫纓之屬。又有不按定例。任意僭越者。御史有稽察部院之責。而各御史中。即有參差不齊之處。是己身先有逾

分違例之咎。又何以彈劾他人。嗣後紫禁城內著三旗侍衛稽察。大城內著步軍統領稽察。外城著五城御史稽察。儻有違例僭越之人。而侍衛統領御史不行叅奏。別經發覺者。將稽察之員。一併處分。○八年諭。大小官帽頂補服坐褥等項。各宜遵照現任品級。不得僭越。從前已降諭旨。後因御史等查奏文武官員內有補服與頂戴不相符者。朕又降旨。頂戴等項。各按本分品級。不得計算加級。所頒諭旨甚明。近聞文武官員。仍有越制擅用者。該管官查問時。則引從前准算加級之例。掩飾支吾。甚屬不合。嗣後內外文武



大小官員。頂戴補服坐褥。悉照本身現在品級。不得指稱加級。以開僭越之端。在京著有稽察之責者。嚴行稽察。在外著該管上司稽察。儻仍復不遵。除將本

人議處外。其失察之員。亦一併處分。○乾隆二年議准。各省官民服飾。自定制之後。凡有違者。王公

由宗人府稽察。叅處。文武大臣。由吏部兵部稽察。叅處。各衙門官員。由該管官查叅。按其情罪輕重。分別處分。違式之物入官。○四年覆准。官

員違例錯用帽頂補服坐褥者。尋增為錯用帽頂補服坐褥

馬等項。無僭越情事者。皆罰俸六月。○五年奏准。京官禮

部司務

尋增為主  
事司務

太常寺博士典簿讀祝官贊

禮郎鴻臚寺鳴贊光祿寺署正署丞國子監監  
丞博士助教學正學錄等官恭遇

壇

廟執事。

殿陛侍儀之時。准其懸挂數珠。其平常在署。仍按  
會典定制遵行。不得越分擅用。如有尋常無事  
之日。懸挂數珠者。一經科道查叅。照違

制律議處。○十年覆准。吏員僭用補服。干謁地方官

者。照例革去職銜。

尋增為地方官不能查出。照  
失於查察例。罰俸一年。若已

經查出。瞻徇情面。不即舉報。照徇情例。降二級調用。至州縣佐雜等官。均

有地方之責。理宜關防嚴肅。如有與在籍吏員往來請託。有玷官箴者。事發。照因事囑託例。革職。○三十七年

諭。御史條奏七品以下官生帽頂。不遵定制。概用素金。嗣後編檢知縣等官。改用蜜蠟頂一摺。所奏原為慎重等威起見。但從前議定頂式。分別銜品。著在儀章。差等本為詳備。今因官生等妄意希榮假借。乃不先懲其違制之咎。而轉欲紛更品目。增出蜜蠟一頂。則事涉煩瑣。可不必行。但內外督撫部臣。俱留心查察。



即需次京城。未登仕版各員。亦有步軍統領。及五城御史等各衙門。可以隨時稽察。嗣後儻有故違成式。戴用混淆。不分金銀花素。如該御史所奏。即行叅革治罪。以重名器。○又奏准。八旗官兵服制。禮部將舊定章程。刷印傳示。各按品級服用。毋得爭尚浮華。任意奢侈。如有不遵定制。即照違

制律議處。○嘉慶五年

諭。給事中邱庭澍奏嚴禁僭用帽頂一摺。據稱每月驗看月選官。及新捐分發試用人員。八九品及未入流各官。俱僭用七品金頂。又近見街市各色人等。纓帽



上俱用紅絨結頂。並有棍徒等假冒官職。戴用金頂。均請嚴禁等語。所奏甚是。此弊由來已久。朕在藩邸。曾經目睹。國家設官分職。等威本自秩然。冠服儀章。豈容稍有僭越。會典所載甚明。乃近日八九品及未入流人員。往往僭戴七品素金頂。並有無職人員。隨意戴用者。此等陋習。朕向有聞見。該給事中奏請嚴禁。甚為得當。嗣後八九品及未入流帽頂。俱謹遵會典。分別戴用。其補服亦應按照定制。毋許稍有僭越。京城內外。著交步軍統領衙門及五城御史各部院衙門。著交該堂官。各省著交督撫等。留心查察。勒限

更換。違者立即叅奏示懲。至外間民人涼暖帽上俱用紅絨大結。尤屬非是。並著一體飭查。嚴行禁止。俾冠服各有等差。官聯益昭整肅。其游手棍徒及逃匪等。有假充職官。戴用金頂者。亦照該給事中所奏。實力嚴拏。毋任宵小弊混。○七年

諭。番役專司緝捕盜犯。原與隸卒無異。凡各衙門皂役人等。例不准其為官。其子孫亦不准應試。則番役自應比照此例。以昭畫一。乃從前步軍統領。往往因番役拏獲要犯。輒奏請賞給頂戴。如番子頭目馬凱。即洊賞守備職銜。且番役子孫。並有應試出仕者。殊不



足以別流品而重名器。嗣後步軍統領衙門遇有番役緝捕勤奮止准量加獎賞。即實有拏獲要犯者亦止可從優加賞。毋許給予頂戴。儻再行濫請。即以違制論。○又

諭。朝會大典。一切服色。豈容僭越。昨日派出喜起舞之三等侍衛世泰。向伊戚鄭親王烏爾恭阿借用帶版。烏爾恭阿不應。即將親王朝帶版借給。而世泰亦不當輒行僭用。均屬非是。烏爾恭阿著交宗人府嚴加議處。世泰著交領侍衛內大臣嚴加議處。○又諭。從前行營扈從之都統副都統等所穿馬褂。均係各

按旗色。原為所屬人等易於辨識。今該員等多不按旗穿用。有失舊制。嗣後凡遇隨圍。除都統毋庸按旗穿用外。其未賞穿黃馬褂之副都統等。俱照舊制穿用。著為令。○八年

諭。御史花良阿奏。外省知縣。身膺民社。時有祭祀典禮。請仿照贊禮郎加銜之例。准戴六品銜頂。挂用朝珠等語。所奏殊屬不通。向來恭遇

壇

廟大祀。朕親詣行禮。贊禮郎等官。因在朕前執事。是以准換六品銜頂。挂用朝珠。並賞穿貂褂。以崇體制。至



外省知縣。雖有承祭禮儀。止係尋常祀典。獲與執事。何得援引比例。輒請一體換用銜頂朝珠。變更舊例乎。原摺著擲還。○十一年

諭。近來八旗子弟。往往沾染漢人習氣。於清語騎射。不肯專心練習。拋荒正業。甚至私去帽頂。在外游蕩。潛赴茶園戲館。飲酒滋事。實為惡習。嗣後八旗官員等。如有不戴頂帽。在外游蕩者。是既不以職官自待。又與平人何異。該管地方官員。即當查拏究治。以示懲誠。○又

諭。前因佟關保兄弟。以現任職官。私去帽頂。在城外飲

酒滋事。當經從嚴懲辦。並明降諭旨。令旗員子弟等。務各謹慎自愛。以飭官方。乃甫閱數月。復有倫布在外揪扭。並不戴用頂帽之事。積習相沿。殊為可惡。若不明示例禁。仍恐不肖之徒。不自檢束。必有復蹈故轍者。嗣後現任文武大員。以及職官。如有私去頂戴。出外行走之事。是已不以職官自居。一經查明叅奏。即著降調示懲。儻復另有游蕩滋事情節。著先行革職。再候究辦。即宗室王公。不自檢束。竟有私行游蕩之事。亦照此例辦理。自此次訓諭之後。各宜顧惜名器。慎毋自取侮辱。以副朕教誨諄諄至意。○又



諭。近日有藍翎侍衛倫布。與筆帖式慶雲。在街鬪毆一案。因倫布並未戴翎頂。所以將倫布革職示懲。並特降諭旨訓飭文武官員。嗣後儻有不戴翎頂閒行者。一經查出。即著降調。如另有游蕩滋事等情。著即革職。再行審辦。今倫布及從前在城門官廳咆哮之佟關保弟兄。皆係黏杆處侍衛藍翎侍衛整儀尉。可見該領侍衛內大臣。鑾儀衛大臣。及黏杆處大臣。顯係平日於該管之侍衛章京。並不留心約束教導。雖經如此降旨訓誡。該管大臣等。不過將此旨閱看後。傳令曉諭各侍衛章京等而已。而各侍衛章京等。或竟

有不得聞見者。著交領侍衛內大臣。鑾儀衛大臣。黏杆處大臣等。務將該管侍衛章京等傳齊。著伊等恭傳此旨。一一面加教導。訓飭遵行。經此次訓諭後。儻有違旨。仍不戴翎頂。在外閒行。或游蕩滋事者。一經拏獲。先將該管大臣等。曾否傳旨訓飭該員之處。究問。如該管大臣等。業經傳旨訓飭。止將該員照從前所降諭旨治罪。若該管大臣等並未傳旨訓飭。不但將該員治罪。並將該管大臣一併治罪。決不寬貸。再隨圍之侍衛章京官員內。朕曾見有不戴翎頂。及露首坐食街市者。即使無力。不能攜帶火食。亦當在街



市買至下處食用。豈有身係職官。竟不戴翎頂坐食街市之理乎。著交總理行營王大臣等。通行曉諭。嗣後凡在行營隨往之侍衛章京官員等。儻仍有不戴翎頂。露首街市。游蕩喫飯者。該總理行營王大臣等。立即拘拏。指名叅奏治罪。斷毋徇隱。○又

諭。成都將軍慶成。此次陞見來京。朕於召對時。念及伊勦捕邪匪。曾經殺賊立功。身受兩傷。節經施恩優渥。因降旨詢問。曾否賞過雙眼花翎。緣事革去。據慶成奏。伊於乾隆五十三年。在副將任內。隨孫士毅出兵安南。曾經